



湖廣通志

人物 文苑

五十七

內閣文庫	
番號	漢 14208
冊數	100 ( 56 )
函號	史 130 1





湖廣通志卷之五十七

人物志 文苑

武昌府

晉孟嘉晉書桓溫傳嘉字萬年江夏岷人司空宗曾孫  
 少知名太尉庾亮領江州辟為從事亮嘗大會賓客豫  
 章太守褚裒問嘉安在亮令於座上自覓裒歷觀得嘉  
 益器之後為桓溫參軍九日宴龍山參佐畢集風吹帽  
 落嘉不覺溫使左右勿言觀其舉止命孫盛為文嘲之  
 嘉請筆作答文辭超卓四座嗟嘆後遷長史年五十三  
 卒

孟陋晉書列傳字少孤嘉之弟清操絕倫布衣蔬食以

文籍自娛口不及世事喪母毀瘠不飲酒食肉十餘年親族謂之曰毀性無嗣更爲不孝然後從吉簡文帝輔政命爲參軍稱疾不起桓溫躬往造焉或謂曰陋學爲儒宗宜引在府溫嘆曰會稽王尙不能屈非敢擬議也陋博學長於三禮註論語行於世

李克晉書列傳字弘度江夏人父矩江州刺史充善楷書王導辟爲丞相府掾轉記室參軍幼好刑名之學見俗尙虛浮痛抑之著學箴除剡縣令尋爲大著作卽時典籍散亂充刪除繁重以類相從分作四部甚有條貫祕閣以爲永制累遷中書侍郎卒所著有尙書及周易旨釋莊論詩賦表頌子顯亦有文義多所述作郡舉孝

廉

南北朝費昶楚紀昶江夏人嘗爲樂府又作鼓吹曲梁武帝重之嘆曰才詞新拔有足嘉異賜絹十匹

隋黃鳳麟楚紀江夏人隋大業中舉進士累遷侍御史比部員外有文集十卷

唐李善唐書李邕傳善邕之父有雅行淹貫古今人號書簏顯慶中擢崇賢館直學士兼沛王侍讀爲文選注敷析淵洽表上之賜賚頗渥後爲涇城令坐事流姚州赦還居沛鄭間講授受業者甚衆

按唐書本傳邕揚州江都人惟曹憲傳曰憲始以梁昭明太子文選授諸生而同郡魏模公孫羅江夏李

善相繼傳授於是其學大興據此則善本江夏而邕  
或僑居江都歟

宋廖正一文獻通考字明畧蒲圻人元祐中召試館職  
蘇子瞻在翰林見其所對策大奇之俄除正字時黃秦  
晁張皆子瞻門下士號四學士子瞻待之厚每來必命  
侍妾朝雲取密雲龍茶家人以此知之一日又命取密  
雲龍人謂是四學士窺之乃明畧來謝也紹聖間明畧  
貶信州玉山監稅鬱鬱不得志喪明而歿自號竹林居  
士著有竹林集三卷

任獻夫字安世蒲圻人政和八年進士溫厚淳雅口吃  
若不能言而中抱淵實爲文冲淡平易理致精密歷荆

門刑曹著有異績祀鄉賢 舊通志

馮洽字深之大冶人朱子門人馮倚弟子也手錄性理  
諸書誦說不厭祀鄉賢

萬貞字人傑大冶人師事朱子稱其氣象儘好今浴沂  
章句乃朱子答貞語也

張丰應大冶人師事朱子講學白鹿洞應爲講尙書周  
官慎刑章世稱通儒

元何維蒲圻人延祐鄉舉與常德孫以忠沅州李壽醴  
陵李明孫才名相埒維尤爲奇特元文選載其試求賢  
詔有兩漢詔令之風

邱堂武昌人延祐丁巳同茶陵陳誼高醴陵馮復可試

湖廣通志 卷之五十一  
雲夢賦文辭瞻麗與衡山何克明並擅名當時稱邱何  
焉

明程立中字執夫嘉魚人家貧常役於官爲尹所辱朗  
吟一詩尹曰才子也會有詔求遺逸遂薦之授縣丞以  
催科後期繫獄一夕成詩百首太祖原其忠愛釋之俾  
復官九載致仕卒

盧文政江夏人幼嗜學溫雅有度洪武己卯舉於鄉授  
吏部主事累官太僕丞致仕年八十手不釋卷著太平  
一覽

朱伯驥通山人成化癸卯舉人任廣州推官從陳白沙  
遊論古今人才不相及白沙以爲知言遂棄官歸講學

以老 以上俱舊通志

劉績分省人物考字用熙江夏人弘治庚戌進士歷知  
鎮江府貫穿羣籍凡所撰述根極理要著有禮記正訓  
蘆泉詩文集

馮世雍分省人物考字子和江夏人博極羣書才華瞻  
麗工書及詩古文詞成嘉靖癸未進士累官吏部郎中  
出守杭州調徽州有惠政致仕歸家居二十年足迹不  
出公府著有三石文集呂梁志行世祀鄉賢

吳國倫字明卿興國人嘉靖己酉解元庚戌捷南宮授  
中書遷兵科給事與李攀龍等並稱七才子時嚴嵩柄  
政稔其才欲致之無從也會楊繼盛疏劾嵩下詔獄臨

刑時倫與王世貞往哭嵩惡之謫江西按察使知事歷任高州府禦島寇有功遷貴州提學轉河南左參政罷歸國倫才氣橫放好客輕財歸田後聲名藉甚所著有甌甌洞正續稿數十卷行世祀鄉賢

明史稿

周炳靈字公含江夏人博極羣書常著洪山賦有石刻存選貢第一天啟辛酉入北闈傅良選得其卷擬元座司以文奇置副車任光化訓導直指薦牘有學富五車才傾八斗之語陞興縣令卒於官

邑志

劉敷仁字濟甫江夏人與譚元春以文行相砥礪所交皆吳楚名士壬午魁京闈南歸築室於荷塘晚而學易逍遙以終

舊通志

金聲字正希號赤壁嘉魚人由選貢中順天甲子鄉舉懷宗戊辰進士初授庶常上封事數千言執政以詞臣不當言兵欲出之外上特嘉其骨鯁擢山東道御史磊落不阿轉山東僉事拂衣歸有燕詒閣尙志堂歸金合

稿諸文集行世

邑志

皇清吳元俊字子人江夏人讀書講學卓然自立曾預修通志又爲江夏書院長負笈從遊者甚衆後司鐸辰溪士多所成就卒於官

胡夢發字卜子大冶人弱齡入庠以黃鶴樓賦見知當事屢試冠軍文名藉甚甲子聘修楚志乙酉以五經舉於鄉時年七十餘新安江少司農爲磨勘官古

於朝曰天下五經胡夢發一人而已年八十四卒  
 方文啟字梅岩江夏人漢陽諸生為給諫文瑞從兄  
 端凝和易無崖斲之行好古法帖名畫藏書數千卷  
 多奇文秘籍工吟咏未嘗留草曰詩以適性情寧求  
 後世知耶卒年八十

漢陽府

明方一鳳字丹山世居黃陂之道明山翁與時少遇異  
 人授秘訣靜久發慧羅文恭過訪獨心器鳳鳳乃受學  
 建水洲別館集四方同志商訂切劘徧遊金陵豫章閩  
 中共質所學歸以樹人善俗為己任邑人十就正教以  
 切已自反遷善改過尋李見羅撫郎為築室於二程祠

右顏曰丹山止所祀鄉賢

舊通志

嚴璉字別砥孝感人年十六補諸生為文宏肆倚馬立  
 就會以秋闈報罷駕扁舟歸值權使者趣之稅問所載  
 何物曰一船愁耳權者悞以為鋤也仍趣之璉走筆呈  
 詩曰獻璞歸來泛上游忽聞權吏鎖孤舟囊中惟有悲  
 秋賦聞道君王不稅愁時鍾譚極推獎之

邑志

劉南呂字師尚孝感人弱冠有聲黌序古作直擬漢唐  
 間明季亂生作野嘆詩三十首謝去舉子業以山水自  
 放年四十三卒

郡志

楊兆儀字寶長孝感人懷宗丁丑進士為詩文滂瀆奔  
 放雄奇與麗荆南胡在恪亟稱之

以上邑志



皇清盧乾元字萬資漢陽人順治乙亥進士授庶常遷刑

部主事工詩律精顏柳書著有世清堂集 舊通志

李必果字仁熟漢陽人幼敏慧十歲入庠博學有智

畧會預修省郡二志性孝友事父母撫弟睦族鄉里

亟稱之子咸有已丑拔貢安化教諭

沈宜字大悟孝感人由明經仕至鎮江推官讀書自

經史子外旁及內典叩之娓娓不窮詩宗大白兼長

於尺牘第完邑諸生學行為鄉里所重

屠體中字心衡孝感人幼為名諸生邑英雋多出其

門性至孝每自館歸省必與父同寢所得館穀悉以

贍族黨貧乏者每言居家孝友居官清白即此是學

人不從事躬行徒托空言無裨也年八十二卒

王戩字孟毅漢陽人中康熙戊子副榜舉山林隱逸

未赴其學最為該博工詩古文詞力追盛唐風格新

城王阮亭亟稱之著有突星閣集數十卷

高騫字處厚孝感人順治戊子明經詩文推重一時

書法宗鍾王士林重之

彭焱字然石孝感明經通經史工書法司訓黃安時

大旱焱力請賑濟且鬻產佐之嘗與某學博江行舟

覆板舟聯吟明日始達岸人咸異之

程正隆字子升孝感人十餘歲補弟子員嗜學敦行

所著詩文甚富尤工迴文體

李殿邦字左釐孝感人幼至孝嗜學好古康熙乙丑  
進士選翰林戊辰會試充同考官分修一統志以疾  
歸未一年卒

夏嘉瑞字人淑孝感人邑諸生爲詩文雄健與衍陳  
百史序其全集曰大白仙才居易人才長吉鬼才人  
淑殆兼之有松雲草詩督學彭禹峯弁其首梓行世  
弟章夏字人千邑諸生其才尤過之早卒

夏光沅字蘭谷孝感人邑廩生人淑姪也楚文風自  
熊劉後督學蔣永修振拔之功爲最按邛時首拔光  
沅歷試湖南北一時著作及遴選事皆委光沅手定  
尋以病卒

丁光偉字雄宙孝感人淹貫經史爲文雄氣逼人康  
熙癸酉舉於鄉尋卒

程正萃字除只孝感人邑明經嗜學喜藏書莫不淹  
洽子大戴大疏俱明經能以詩古文詞世其家

夏熙臣字無易孝感人參政時亨之孫少孤七歲能  
文有神童號長益嗜學嘗遊白雲山中值雨寓舍無  
書僅字彙一部取閱之終身不問難字其他記覽類  
此爲文不屬草尤耽詩嘗限以百韻咄嗟立就家故  
饒手一編外不識權衡數遂以貧困由明經授通城  
諭累補安陸府教授卒於官著作等身所刻有慕巖  
詩畧

張典字南塘孝感諸生督學蔣永修深器之風神嶽嶽以氣節為士類先姻婭有貴顯者折簡招十不一赴為文力追先正尤喜誘掖孤寒貧且天又無子士大夫深悼惜之

陳陞謨字淳洋孝感人郡廩生讀書目數行下閱廿一史凡六過道錄佛經無不洞曉為制藝幾萬餘首詩稱是所著有擒思錄督學潘宗洛董思凝極賞之鄉試作五經竟日已畢年三十五卒

夏立中字映川孝感人少勤學每夜課雞鳴方就寢以五經冠童子軍楚地經學自此盛士爭負笈後主湖南集賢書院二年從遊益衆辛丑成進士引

見時


聖祖賜問家世甚悉授庶常誓以讀書報

國染疾不起雍正元年卒於京蒙

恩例乘傳歸葬生平孝友嫻睦與人交不立城府至誠感人人自愛之柩還鄉里道路迎哭者無筭子扶雛丙午舉人

程大純字漢舒孝感人由明經司訓麻城遷黃岡諭獎士類振孤寒善氣迎人無秀頑皆誦之尤敦行誼與兄大緒友愛最篤視兄子猶己子手一編至老不輟皆洛閩遺音也子光鉅官檢討

王大綸字慕盧孝感人四歲失怙哀毀如成人第大



績蚤卒綸撫幼姪如已出爲諸生時邑令延王西湖  
講席已丑成進士宰新鄉十年有惠政五攝鄰篆調  
考城授中翰擢御史一年卒子廷鴻官庶吉士

黃州府

**宋**潘大臨字邠老明一統志黃岡人同弟大觀皆有詩  
名與蘇軾黃庭堅張耒游冷齋夜話黃州潘邠老工詩  
有佳句然貧甚東坡山谷尤善之祀鄉賢

**明**華巒分省人物考字伯瞻蘄州人父仲賢任布政使  
巒早負雋才弱冠發解登成化丁未進士歷翰林編修  
性凝重文詞清麗館局推重之尋卒李文正誌其墓祀  
鄉賢

潘子安黃州人由保舉任四川夔州府同知工於詩賦  
有海天青嘯詩集舊通志

韓萬鍾字天爵蘄州歲薦嗜書史持守方正分教休寧  
擢潁州學正皆以身範物不失尺寸究心天人之理著  
有象緯彙編等書

秦繼宗字西汀黃岡人萬曆甲午解元庚戌進士著禮  
記疏意綱鑑要畧諸書

詹馭字三畏同文裔孫少負奇姿十歲爲名諸生從學  
於羅念菴輪貢讓後人者三卒年三十九

劉承烈字拙齋麻城人操履清介學以格物爲宗生平  
閱易百四十家晚著易學就正凡國家典故講究精博

歲時會論聞者皆悅服

劉侗字同人麻城人懷宗甲戌進士客都門著帝京景物畧行世後之吳縣任卒於維揚舟次侗以千秋自命不苟同於世未竟其用而沒

以上舊通志

阜涓劉醇驥字千里廣濟貢生生而有文在手日曆及長性簡靜方直勤學不倦工爲古文詞嘗歎宋元以來文體日卑因奉左國史漢爲矩矱同里顧景星張仁熙每亟稱之

高思忠字孝移黃岡諸生少穎異每試冠軍督學高世泰修三楚文獻忠與其事順治辛卯中副榜後領鄉薦授遠安諭以疾未赴任

陳芳烈字中紀黃岡人好古勤學博極羣書尤潛心易理爲文雄博浩衍年三十卒

以上俱舊通志

朱日濬字菊廬黃岡歲貢均州訓導博洽有文行闡揚正學士人奉爲典型著有五經門卒於官

靖乃勳字敬庵黃岡諸生好讀書博聞強記受知於學使蔣永修性慷慨有經濟才甲寅山寇蠢動太守于成龍討平勳贊畫之功居多縣有蠹胥飛灑無微糧石於其族族人莫辨勳取冊一覽卽燭其弊其才智多類此子道謨辛丑進士選館出知姚安州

顧景星字亦方蘄州貢生八齡賦鰲山燈稱神童比長博極羣書詩文爲海內所宗與錢謙益龔鼎孳王

士正諸人齊名楚中談風雅者必以星為最康熙戊午以博學弘詞薦著有白茅堂集黃公說字數十卷欽士佃字文思黃岡人康熙癸酉鄉試第一庚辰成進士官翰林士佃生時父方為北城兵馬副指揮年十二孤家貧力弱汲瓶拾薪養母以孝聞性恬淡臨事不苟磊落無城府遇人機辯寂如也工詩歌古文疎爽幽雋掌院韓慕廬極推重之謂其文為尹師魯梅聖俞之亞有瀛洲集行世

舒逢吉字康伯廣濟人歲貢生天資敏捷文不加點兼嫻韜畧王甫臣之役參軍幕有籌畫功後任瀏陽訓導上官知其才令攝縣事判決如流獄多平反第

峻極遂吉文行皆卓絕峻極書法似米襄陽時有河東之譽

徐琮字侶蒼蘄州人九齡時入塾得遺金俟道旁還其人補諸生腹笥甚富尤工詩畫六書之學著有古文篆韻五卷夏逆叛土賊乘亂竊發琮率壯士火其寨賊遂奔竄鄉人德之負氣節好遊覽足跡所及醴雁初徵卽納履去視非義之財蔑如也長貧斷炊賦詩自樂以老

安陸府

〔宋〕張徽明一統志天門人以詩名著有滄浪集司馬光范純仁皆與之友祀鄉賢

明陳文燭字玉叔沔陽人嘉靖乙丑進士授大理評事時七子有時名意不可一世文燭鴈行其間不少讓出爲淮安守以治行遷四川學使轉參漕事遷大理卿致仕歸建五嶽山房日率親故飲酒賦詩其中著有五岳山人集歸有光序之謂其善學龍門舊通志柳向陽荆門人從賀正講學於象山書院精通洪範太極之學爲人方正嚴厲待後學不假顏色人有敗行惟恐陽知之以歲貢任桐城諭多所成就

鍾惺字伯敬天門人萬曆庚戌進士授行人乙卯典貴州鄉試改工部主事轉南禮部陞郎中以僉事提學福建尋丁外艱去惺體貌清羸爲人嚴冷不喜接俗客萬

曆間取歷代詩與同邑譚元春選訂名曰詩歸愛名山水所至必極遊覽卒年五十二祀鄉賢

譚元春字友夏天門人天啟丁卯鄉試第一父早逝有弟五人皆嚴督之事孀母魏氏最孝弱冠與同邑鍾惺締交譚久未遇丁卯太史李明睿典楚試素知春闈中手其牘曰此必友夏也已而果然皆賀得人春好遊足跡徧東南喜揚人善士賴以成名者甚衆卒年五十二祀鄉賢以上舊通志

皇清陳應正天門人少穎敏積學善屬文補邑弟子員孝友端方言笑不苟鄉里奉爲楷模家故貧事親養志親歿廬墓邑令魯可辨扁其門曰聖世篤孝舊通志

胡承諾字君信天門人丙子鄉舉未仕積學多才專

以著述為事年七十五卒 舊通志

朱載震字悔人潛江貢生授石泉令卓有循聲師事

王又旦歿後梓其遺集其篤於古誼如此著有東浦

詩集王司寇士正序之歎為騷人之苗裔力追古作

為世推重焉

德安府

宋張君房安陸人湘山野錄真宗時日本國入貢求本

國神光寺記舍人詞不工令學士張君房代之張退食

多潛飲寺樓掖垣求之不獲大窘時種放以司諫歸華

山後楊億改閒忙令曰世上何人號最閒司諫拂衣歸

華山世上何人號最忙紫微失却張君房

王得臣字彥輔安陸人問學該博以文章名世嘉祐進

士官至司農少卿號鳳臺子所著鳳臺集若干卷及江

夏辨疑一卷古今紀詠集五卷塵史二卷年八十猶嗜

書史至老不倦 舊通志

宋綬宋史列傳字公垂其先趙州平棘人徙隨州博通

經史百家年十五名試中書真宗愛其文後又試學士

院為集賢校理官至資政殿大學士孝謹清介言動有

常家藏書萬卷親自校讎筆札尤精妙及卒帝多取其

書字藏於禁中祀鄉賢

宋敏求宋史宋綬傳敏求綬之子官至龍圖閣學士家



有書三萬卷皆畧誦習所著書學者多咨之祀鄉賢

元趙卿月復之子克紹家學與許衡劉因友善嘗拜憲司職未久謝去屢徵不起舊通志

魯璠字嶼公應山人好學工文辭制行端肅為中牟令有賢聲居鄉以禮訓俗鄉人尊之祀鄉賢舊通志

明華清分省人物考清字廉卿應城人穎慧博洽成化壬辰進士授蘇州推官以直免歸杜門吟咏自適為文

爾雅兼通字學繪藝士人多傳之著有東軒集祀鄉賢陳士元字心叔應城人嘉靖甲辰進士知灤州未幾以

才見忌遂解綬歸著有歸靈集及楚志舊通志皇清李弘建字書常雲夢人康熙壬戌進士敦行孝友勵

志詩書為文獨傳經義以謁選卒祀鄉賢

荊州府

南北朝庾肩吾南史庾易傳肩吾字慎之八歲能詩為晉安王常侍被命與劉孝威等共十人抄撰羣籍號高齋學士官至義陽太守封武康縣侯卒

庾信北史列傳字子山肩吾子博覽羣書尤善左傳仕梁為抄撰學士與徐陵文竝綺麗世號徐庾體後以右衛將軍使西魏被留長安後周時為恪州刺史為政簡靜吏人安之信雖位望通顯常作鄉關之思乃作哀江南賦以致意所有枯樹等賦及諸詩文論者謂徐陵之奇肩吾之腴子山兼之

隋蔡允恭明一統志江陵人父大業仕後梁為左民尚書允恭美姿容工於詩仕隋為起居舍人煬帝有所賦必令諷誦遣教宮人俾入宮改內史允恭恥之由是疎斥所著有後梁春秋

唐綦毋潛姓譜字季通荆南人開元十四年舉進士第為詩峻峭善寫物情後補宜壽縣尉入為集賢待制遷右拾遺終著作郎

段成式唐書段志元傳成式字柯古文昌子以廕為校書郎博學彊記多奇篇秘籍侍父於蜀以畋獵自放文昌遣吏止之明日以雉兔徧遺幕府人為書因所獲儷前世事無複用者衆大驚累擢尚書郎終太常少卿著

西陽雜俎子安節仕至國子司業

薛據荆南人全唐詩小傳作河中寶鼎人骨鯁有氣魄為文卓犖不羣嘗著古興詩見志殷璠亟稱之仕至太子司議郎

戎昱姓譜荆南人至德間以文名登進士衛伯玉辟為從事常著元戎出塞詩京兆尹李鑿欲妻以女命改姓昱拒之建中間歷辰虔二州刺史

崔道融全唐詩小傳荆州人以徵辟為永嘉令累官右補闕有詩十二卷

劉蛻字復愚明一統志荆南人荆南歲解舉人多不成名蛻始及第號為破天荒

宋夏侯嘉正宋史列傳字會之江陵人舉進士歷官著作佐郎嘗使巴陵換洞庭賦辭極宏麗徐鉉見之曰是木元虛之流也端拱初召試詞賦擢右正言直史館兼直秘閣賜緋魚元夕太宗御乾元門觀燈嘉正獻五言十韻詩上依韻和賜之未幾卒年三十七子紆太子中舍

朱昂荆南人好學有清節時朱遵度好讀書號朱萬卷目昂爲小萬卷累官翰林學士以工部侍郎致仕所著有資理論三卷弟協以純謹著稱仕至主客郎中雍王府翊善亦告老歸時人比之二疏昂子正彝正辭俱登進士第

舊通志

張景字晦之公安人少從河東柳開遊悉出家書畀之嗜學益力與孫僅朱嚴輩相麗益聲華日振真宗詔有司計偕天下士景居首列爲房襄二州文學參軍轉寶應簿後通理直州事明一統志仁宗詔見景問曰卿在江陵地有何景對曰兩岸綠楊遮虎渡一灣芳草護龍洲曰所食何物對曰新粟米炊魚子飯嫩冬笋煮鱉裙羹所著有洪範王霸論數十篇

元顏達龍江陵人家貧力學行義自持不苟取給於人所著有詩經講說

舊通志

明韓守益分省人物考石首人洪武中監生授宜都諭入爲監察御史與子春同改右中允守益問學博雅善

屬文其詩尤渾淪可誦建文中父子列侍經筵有言必盡祀鄉賢

劉淵字伯廣江陵人宣德九年舉經明行修宣宗御批其卷曰文理通暢宜受教職命為京山諭舊通志

尚校字育英公安人生有異稟日記萬言年十九中弘治戊午鄉舉先是公安詩文尙未大闢校弱冠時即立意為詩古文詞有黃鶴樓賦又諷在位者無取腴民以自封殖作蚤蚤嘲以寓意同上

劉珠字福井公安人少穎異下筆數千言立就隆慶辛未成進士與張居正為布衣交居正當國珠未嘗稍暱就其詩古文詞不屑摹擬塗飾直據其意所欲言著有

疑庵集 縣志

魏良佐字襄銘江陵人中萬曆丁酉鄉舉授仁壽令歷任錢法道僉事清白自矢時論重之幼工黃庭晚益肆力二張舊通志

劉在朝字長孺監利人天啟乙丑進士授福清令擢戶曹陞保定府憲副備兵易州解組歸以文章傳子孫同上

黃家梧江陵人幼負竒姿為袁宏道所賞識以子彭年受業益肆力詩古文詞人推名宿同上

王文南字季豹江陵人懷宗己卯解元學問該博時人比之楊升庵詩歌伯仲七子交與多一時名宿荆郡前

志乃其增修

皇清李日郁字文叔松滋人順治辛卯進士少年登第力行孝友議論文章根據理要早逝人爭惜之始祖黃姓明初僑寓松滋改從外父姓蓋黃子澄後裔也張弘圖字文篤江陵人有雋才多讀異書爲諸生試輒冠軍中康熙丁卯鄉試第二戊辰成進士任陝西興平令卒兄厚圖第峻圖文與齊名鄭其畋石首人歲貢性至孝父士前鰥居不再娶畋竭力奉養飲食卧起不假僕婢比父卒始終如一撫叔士良幼子有成始析箸鄉人稱之十入棘闈不售以明經老積書甚富子六家雙家禹舉於鄉臯說與

望皆庠生

襄陽府

漢劉珍後漢書文苑傳珍字秋孫少好學永初中爲謁者僕射詔校定東觀五經傳記百家藝術及撰建武以來名臣傳又撰釋名三十篇以辨萬物之稱號劉熙叙之

王逸襄陽耆舊傳字叔師南郡宜城人元初中舉上計吏爲校書郎順帝時爲侍中著楚辭章句其賦誄書論及雜文凡二十一篇作漢詩百二十三篇祀鄉賢王延壽後漢書王逸傳南郡宜城人子延壽字文考有雋才少遊魯國作靈光殿賦蔡邕亦造此賦未成及見

延壽所為甚奇之遂輟翰曾有異夢意惡之乃作夢賦以自厲後溺死年二十餘

謝該後漢書列傳字文儀棘陽人明春秋左氏為世名儒門徒數百千人河東樂詳條左氏疑滯數十事以問皆為通解之名為謝氏釋行於世仕為公車司馬令以親老託疾去官會荊州道斷不得去孔融上疏薦之詔徵還拜議郎以壽終

晉習鑿齒晉書列傳字彥威襄陽人少有志氣博學洽聞以文章著稱荊州刺史桓溫辟為從事轉西曹主簿累遷別駕奉使至京師還溫問相王何似答曰生平所未見大忤溫旨左遷戶曹參軍是時桓溫覬覦非望乃

作漢晉春秋以裁正之後以脚疾廢子辟疆有父風位至驃騎將軍從事中郎按漢晉春秋進蜀黜魏已為綱目發凡矣

南北朝岑善芳棗陽人性清慎通經史仕梁為散騎常侍諡敬所著文集七卷子七人并有操行舊通志

唐杜易簡唐書杜審言傳易簡襄陽人晉征南將軍預遠裔九歲能屬文博學有高名擢進士累官至考功員外郎左轉開州司馬卒所著御史臺雜註五卷文集二十四卷行世

杜審言唐書列傳字必簡襄陽人擢進士為隰城尉恃才傲世嘗曰吾文章當得屈宋作衙官吾筆當得王羲

之北面累遷洛陽丞坐事貶吉州司戶參軍後入爲修文館直學士卒初審言病宋之間武平一等省候答曰吾在久歷公等今死固大慰但恨不見替人云少與李嶠崔融蘇味道爲文章四友融死審言爲服總子閑孫甫

王仕源宜城人藻思清遠深鑒文理好遊佳山水年十八登陵山衡嶽過蘇門入太行經王屋訪太白終南天寶中詔徵京邑討論校正孟浩然詩集爲序詞理卓絕所著有亢倉子

劉棗強襄陽人失名善爲詩美麗恢瞻與李賀齊名王武俊鎮冀州敬重之辟爲從事不應表授棗強令固辭

隴西公李夷簡復聘爲賓卒皮日休爲撰墓碑

以上舊通志

皮日休全唐詩小傳日休字襲美襄陽人性傲誕隱居鹿門自號間氣布衣以咸通八年登進士第崔璞守蘇辟軍事判官入朝授太常博士黃巢陷長安僞署學士使爲識文疑其譏已遂及禍

宋石深明一統志光化人仕爲朝散郎博通古今其詩淡泊時出偉麗晚自晦田里有滄浪集祀鄉賢

張友正宋史張士遜傳友正字義祖友直弟杜門不治家事居小閣學書積三十年不輟遂以書名神宗評其草書爲本朝第一

魏泰字道甫明一統志襄陽人崇觀間章惇爲相欲官

之竟拂袖還家善文辭著臨漢隱居集東軒筆錄襄陽形勝賦祀鄉賢

元暢淳夫姓譜襄陽人博學能文仕至翰林學士卒贈

文肅子敏仲亦有才名

金希說姓譜襄陽人仕為內臺御史博通經史善屬文

弟希舜亦有文名

陶元幹姓譜襄陽人淹貫經史嘗註易世稱為陶易

明邵濟字濟時襄陽人性孝友學極淹博景泰壬午舉

人同知廣州府未五十輒投簪曰瘴鄉南荒豈可戀戀

以繫母思所著有哀珍集百餘卷子廷璵進士

何宗賢字邦憲襄陽人成化甲辰進士知廣德州善詩

文性耿介不諧於俗著西峯類稿

徐鏗均州人長於詩學嘗纂修兵志以貢司教江寧俱

舊通志

鄖陽府

明張文鄖縣人少能文領正德丁卯鄉薦歷舉進士不

第遂罷公車杜門謝客手不停披以讀書老學者宗之

直隸歸州

漢尹珍施州母斂人桓帝時自以生於荒裔不知禮義

乃從汝南許慎應奉受經書學成還鄉里教授於是南

域始知向學官至荊州刺史 舊通志

長沙府




唐陳光問楚寶長沙茶陵人讀書靈巖山中年六十忽有雙鶴鳴其友沈彬曰必登雲兆也是歲果同曹松登第為五老榜撫言云天復元年令中書門下選擇新進士及第中有久在名場年齒已高者各授一官禮部侍郎杜德祥奏進士陳光問年六十九詔光問可秘書省正字

五代徐仲雅楚紀其先關中人徙居長沙年方弱冠馬希範辟置天策府與拓跋恒李弘臯廖匡圖等為學士時造九龍殿沉香雕龍飾以金寶重斂供役仲雅規正不從後邊鑄入長沙仲雅遷匿周行逢慕其名辟之不仕

宋狄遵度宋史狄棐傳子遵度字元規少舉進士為襄縣主簿數月棄去著春秋雜說多所發明有集十二卷譚昭寶楚紀字珍卿茶陵人父用式仕宋為提舉昭寶五歲能讀五經知為文辭七歲應童子科中上第其謝啟畧曰七歲遠離於膝下九經流出於胸中著封兼十極之圖蓬矢效由基之射童科雖異文解則同破雲州千古之荒駕月殿丹楹之路啟傳禁中理宗見而異之大加稱賞  
鍾震姓譜湘潭人從朱晦菴受業建三一書院講道鄉人咸宗之號三一先生

元馮子振元史陳孚傳攸州馮子振豪俊與孚畧同於



天下之書無所不記當其為文也酒酣耳熱命侍史三人潤筆以俟子振據案疾書隨紙多少頃刻輒盡張康姓譜湘潭人少孤力學旁通經術江萬里畱夢炎皆推重之辟置幕下後隱衡山元世祖遣中丞崔或祀南嶽就訪隱逸具以聞召康至上都親試所學授著作郎禮遇殊厚遷秘書監丞

明陶顯位寧鄉人歲貢生授桃源教諭陞潞安教授潛心理學以端謹著稱府志


婁昇楚紀湘潭人永樂癸卯鄉薦第一典教以師道自勵宣德己酉考試山西得人最多奏績延試賢豪贊經論詩擢禮科給事中

黃學謙善化人以恩貢任韶州諭擢陝西興平知縣少著文名其弟孝廉學璞學良咸侍筆硯里中知名士多出其門著有紫巖集府志

李兆先明列朝詩集字徵伯西涯先生之子也生十餘歲能為歌詩古文驚其長老以蔭為國子生年二十七而夭天子為致賻焉

皇清周應運善化諸生讀書尚氣節不隨世俯仰杜門著述年七十餘猶挑燈夜坐手不釋卷所著有蒲園集及集陶詩舊通志

魏宗衡長沙歲貢生性行端方學有原本閉門著述有移菴遂筆小學人物考孝經衍義當事聘為岳麓



書院山長不赴

江有溶長沙人專精著述尤善於詩教授里中常炊烟不繼晏如也

趙而忭開心子廕補中書舍人少負奇才遊京師與常熟錢謙益合肥龔鼎孳以文章契合有才子之目熊趨善化人中庚午經魁治家以禮力屏異尙與邵陽王元復寧鄉張鳴珂講明正學湖湘學者得聞程朱之緒歸唐之蘊三人有力焉

黃夢弼善化諸生遭亂避瀏陽山中負米養親屢瀕於危猶手一編不輟性尤剛耿面折人過晚年訓勵子姓以根柢爲文科名踵接

廖志灝醴陵歲貢生至性夙成母歿致哀盡禮徒步謝數邑之弔送者廬墓毀瘠未終禫而卒嘗作天山書院欲延致同人辨似是之非採一得之長講求正學歸於一轍有志未就

張鳴珂寧鄉歲貢生覃思經學其疏解各發新意通涉方伎尤邃於醫曰吾未爲世用聊以濟物耳兄弟五人從弟一人其夔終身內外無間言

李明恭善化諸生嘗傾家貲爲族人完賦治家一遵古禮喪祭不用僧道里人多師效之好讀書晚年猶手錄程氏易傳示子侄曰內聖外王之迫盡是何以多爲淵源所漸族黨蔚興

蔣之綦湘陰歲貢生才性敏茂工詩文合肥龔鼎孳稱爲羅江才子然接人和厚人以是重之子常尊亦貢太學有文行巡撫趙申喬延入星沙書院課士有章程

陳金臺湘潭人歲貢生好經濟之學四方知名之士經承指畫者甚衆明季獻賊破湖湘匿影衡山益究心於古今爲理得失利害其源流條貫如別黑白如區畦眇孫鵬年蔚爲名臣金臺之教也

徐日東益陽諸生居家孝友雍睦好讀書善誨人子弟皆掇科名持身嚴正人不敢干以非禮中年失偶終身不再娶晚年學益邃清言妙理爲士林宗

夏寢大益陽人由明經授武昌訓導先是益陽歲輸悉由里長民病侵牟縣令胡孟虎訪於寢大遂復細民上納之法寢大紀其事於碑

陳之駉攸縣貢生博覽羣書爲文淵雅從遊之士若衡山譚吏部尙箴暨弟尙笏桂陽郭遠皆有文名

郭金門善化人父嘉言慷慨好施以故金門寒苦力學工詩文領康熙甲子鄉薦巡撫丁思孔聘爲嶽麓書院山長以義理相切劘受業者科第相望任榮河令致仕歸

黃文憲字千頃善化人雍正癸卯鄉薦孝友端方家甚貧一介不苟嗜古力學工詩文後進多所造就與

修省志甫竣以疾卒時論惜之

衡州府

唐李寬明一統志衡陽人元和中始於尋直觀剏石鼓書院以爲讀書之所刺史呂溫有詩

五代歐陽彬衡山人博學能文詣馬氏求謁不遂乃入蜀獻獨鯉朝天賦王悅擢居清要其後官至尙書左丞相出爲夔州使喜曰青山綠水中爲二千石豈不美哉

舊通志

宋李士直衡陽人至道中會境內儒流講學於石鼓書院重加修建得上聞賜額

舊通志

黃照隣姓謹桂陽軍人祥符間舉進士仕爲職方郎中

嘗讀書於郡西芙蓉山石林亭鄉人號爲職方巖子植

元熙二年進士官朝請郎知貴州

葉蓋楚紀耒陽人熙寧中試才難賦魁上庠後知郴州

秦璽楚紀衡州安仁人嘉定十二年登劉涓榜進士深

於理學號南澗先生

侯宣明一統志衡山人少遊四方還家築室道旁俾遊

學之士往來館焉行之二十年會無倦意遠近號曰侯

家書院

尹沂姓譜鄱人積學好古嘉定中建臺山書院延明經以教邑中俊彥置田百二十畝以供祀事贍生徒一時士風丕變

湖廣通志 卷之三十一  
陳敬叟姓譜臨武人博學能文咸淳中進士授耒陽學錄後解歸高隱肆力於詩文有吳溪集行世

元陳楚春臨武人至正中授長沙教諭順帝在道州楚春爲詩上之有紅日馬頭天已近青雲鴈背雨初晴之句帝曰此等老儒宜大用之乃居此職及北還御極以楚春充扈從官至京命賦神州八景稱旨擢湖南廉訪使

舊通志

何克明楚紀衡山人元延祐丁巳中湖廣鄉試第一所爲雲夢賦爲世傳誦

明寧咸衡陽人自少卽能爲古文詞肄業成均志在講學嘗構共學軒以處生徒所著有易編論語類補全楚

會錄說輟稿舵樓閒記嘗作功名論謂人世所說功名實富貴耳又居其所後父母之喪作爲人後論難蓋其學有本云

舊通志

王萬善衡陽人嘉靖辛酉鄉試第一志意高遠淡於世味聞新安陳弘忠講心性之學遠道諮叩歸坐一室覺方寸泓澄欣然有得也同遊者慕其冲和比之黃叔度

舊通志

皇清鄒章周鄱縣歲貢生孝廉統魯之子通涉經傳與周士儀修衡州府志及分修湖廣通志又輯臨武志母喪廬墓病卒

鄒定周鄱縣歲貢生章周之弟與兄俱以孝友著聞

海虞通志卷之二十一  
三十一  
爲東安訓導刻銘黷舍誘掖甚勤

譚瓊英衡山人歲貢生嫉明中葉以後理學不明人喜詆毀程朱訟剝子書以駁爲奇以僻爲興與子弟講學論文一出於正色議徭賦及有興建令長皆委信之實其素行允孚云

彭齡字小籓衡山諸生少通五經尤精春秋學淹貫三傳折衷於程伊川胡文定斥春秋繁露爲贗書所批閱不下數十家性恬淡耻事干謁勤於教子晚歲猶日摘經書疑義反覆解說喜吟咏曠然有絕塵想駉園集其一轡也詳衡山縣志年七十一卒

蕭士熙衡山諸生幼警敏涉獵經史能爲詩歌古文辭衡州府及衡山縣志多出其手

周命圭士儀孫康熙庚午舉人少孤母勵苦節命圭以教授所入奉養其母通經學善成就後進云

戴日煥字晉元衡山諸生博極羣書爲文雅慕歐曾老猶勤學足跡罕入城市所著有衡山縣志

王敬衡陽歲貢生孝廉王夫之子年三十始應試爲詩文高卓敦尙氣節督學成器之修府志垂成卒文之理字玉山衡山諸生屢試冠其曹古文辭典贍中具有風骨立昂端方接引後學藹如也

永州府

唐史青姓譜零陵人博聞強記開元初自薦云聞曹子

建七步成章陛下若試臣願五步之內可奉詔日試萬言臣願足矣試昭君怨歲除詩明皇大稱賞授左監門衛將軍

覃季子祁陽人柳宗元集覃季子生愛書貧甚尤介特不苟受施讀經傳言推太史公班固下到今通為書號史纂又取鬻老管莊子思晏子下到今其術自儒墨名法凡有益於世者為子纂黜陟使取其書以氏名聞除太子校書

五代何仲與姓譜營道人母嘗夢仲舉入月尋與范質同登後唐長興間進士因賜所居鄉曰進賢里日化龍仕終天策府學士

宋歐陽程楚紀營道人少貧為郡吏郡後有池常淬鐵為戎器名鐵作池植亭其旁一日太守於吏牘間得副紙紀池之勝有寒影倒吞臨漢樹冷光高浴半天星之句問知為程語大驚異之與之金使歸為學登太平興國八年進士累官屯田員外郎

蔣敏修姓譜營道人十五遍讀諸經子史其父璨命作無絃琴賦立成人異之既長以文名元豐間登進士仕桂州理刑掾有文稿三十卷

唐人鑑姓譜字德明零陵人好學能文楊誠齋始至即與納交一日誠齋假香爐以問卜人鑑以小詩送之曰聞焚香爐要決疑不疑何用卜著龜聖人自有韋編在



進退存亡豈不知誠齋得詩大嘉之後築室於州學之西植竹萬竿誠齋名玉立齋

樂韶楚紀字成之零陵人穎悟絕人讀書五行俱下十歲能屬文弱冠登第授桃源尉

嚴昌裔姓譜字慶會零陵人性沉靜張浚謫永州昌裔登其門而受學焉子棫與相友善

義太初楚紀字冲遠營道人厥考宗濂溪之學以迺太初太初學知本源登淳熙戊戌進士從朱文公遊深有

所得楊誠齋趙端明皆器重之

張紆楚紀樞姪字公飭性高潔嘗遊紫巖先生門與南軒為友

吳倫楚紀字子常零陵人受業於南軒南軒之帥江陵也倫從之及易簣倫在其旁乃曰蟬蛻人欲之私春融天理之妙蓋以告倫也

蔣復字汝行零陵人博涉書史隱居東山介然自守非其交不與也與吳倫同受業於張棻門下有澹巖遺稿藏於家

舊通志

唐徹楚紀字子卓零陵人績之族人也謁劉靜春先生授以近思錄學益進歷官廉慎

唐復楚紀字子立零陵人徹之弟也受學於呂東萊之門號敬齋嘉定甲戌進士為衡陽尉

何友蘭道州人嘉定四年進士歷官至大學士後歸里

理宗御製七言古風一章送行復賜書營川漁隱四字  
舊通志

吳必達楚紀字材卿道州人以詩義薦名淳祐元年進士第一授建康府教授七年擢奉議郎尚書禮部架閣兼給事中借紫金魚袋

元鄧桂賢字國望零陵人少聰敏好學大德間任本路儒學選潭州路學正不赴說經授徒帖木兒常師事之延熹間編集郡志成鑄先聖廟祭器樂器有功學校  
舊通志

文均範東安人少聰敏善屬文詩有唐調至正時被徵不起  
舊通志

張韶明一統志道州人以明易經舉於鄉累官朝列大夫海北海南宣慰司都元帥府僉事

明文明東安人秉性友愛雅志正學生徒受業無間遠邇成化十六年貢太學不樂仕進常獨處養謚畧無惰容晚年尤好學不倦  
舊通志

于材楚紀寧遠人成化戊戌進士選翰林院庶吉士授編修天資高邁學問該洽

謝思申祁陽人領嘉靖癸卯鄉薦私淑陳白沙從學湛若水羅洪先嘗著聞見錄每所聞嘉言懿行必書之  
舊通志

呂學簡零陵人家貧嗜學工古文辭領萬曆辛卯鄉薦

授澧州學正癸卯以禮經分校貴州陞南部令歸構六清亭說廣拙編栩栩夢語

陳貞祁陽貢生性孝友制行端方工爲詩文教授里中生徒甚盛萬曆己未纂修府志一時最稱博學

易三接零陵人性剛介高自期許著零陵山水志有暇齋諸集 以上舊通志

皇清陳禧零陵人歲貢生少以淹博著聲尤精於易垂老兩目眇昏日集生徒講解指畫娓娓不倦人咸以耆

宿奉之選湘潭訓導尋卒

王渥零陵人以歲貢生選長沙訓導年老未赴卒渥孝友嗜學家塾教授具有渠範

寶慶府

明車萬合大任之孫天啟辛酉舉鄉試第一高潔杜門長於吟咏以閒爲宗 舊通志

皇清王元復邵陽貢士其學究心於皇極經世書淇範內篇律呂新書皆有新得之義善啟誘後學湖南人士尊師之

岳州府

宋羅孝芬楚紀平江人字廷颺宣和間登進士甲科仕吏部郎中靖康初致仕歸李儒用楚紀字仲秉平江人登嘉泰壬戌第歷官制幹時朱子寓岳麓儒用受業於門醴陵吳獵爲制置使宣

諭蜀中辟幕下薦其人品經術可以大用未幾卒所居練溪學者稱練洲先生

李杞字良仲平江人朱子門人有池州語錄

李雄楚紀字伯英平江人年二十客臨安遇蔡元定導以見文公遂受業於門與黃直卿康叔臨蔡伯靜及其弟仲默講貫明徹具見語錄雄博學貫通尤有志於當世星緯占候孫吳兵法咸詣其妙時黨禁嚴諸賢貶斥異地或徙或死雄徒步赴之曲為料理後其學盛行從遊者甚衆創陽坪書院居之學者稱陽坪先生  
鄒輓楚紀字行之平江人安貧樂道人咸重之朱晦菴往長沙道經平江輓謁之教以歸取四書讀之於立身

宅心體察久自有得歸讀論語稍有悟處乃曰古人為學只是實學工夫學以為己豈但如俗儒詞章專事利祿哉卒之日棺衾皆出友人方叔行云  
毛友誠楚紀字伯明平江人聞康叔臨傳程門學寓巴陵從之遊謝棄科舉闔戶讀書尤邃於易教誨後進不倦

方輓楚紀字叔行平江人資稟凝重李弘齋教授岳陽輓慕紫陽正派師之返弘齋誨以詩曰博文約禮終身事修已治人種德書好把從頭親切看若非親切總成虛輓自此謝棄科舉從事根本之學輓生平未嘗疾言遽色家庭雍睦子弟肅恭魏了翁名其室曰學齋

許應寅姓譜平江人與弟應廷有文名同登紹定二年進士應寅尤以操行著

嚴鉤華容人進士以詩名家與安陽韓琚齊名應試有鴻鴈來賓賦一時傳寫蚤天當世惜之舊通志

元方敏中巴陵人年十二通經書春秋義潛心嶽麓遠教書其室曰自明軒從遊者教以克己為要高尚不仕見臨川江漢叙錄

丁濬字國器巴陵人以鄉貢授河南通判遷鞏昌同知為人重厚質實自少至老敦行不怠鄉族重之居官守已臨民皆有法進四品服俸卒

李用庚平江人遊太學以舍法釋褐同年毛養齋客死

用庚率鄉士經理後事纖悉靡遺教諸生知世務期於有用是時宰平江者莫不重用庚風誼用庚介立未嘗

一言與邑政以上舊通志

鞠志元楚紀巴陵人至順癸酉會試中書省試蒲輪車賦號為雅贍至元間官宜都令按舊通志作鞠志誤

明嚴承範華容人正德戊辰進士博學工詩與永濬稱大小嚴授戶部主事甫七月告歸以著述自娛有青湖集

程宗舜華容人嘉靖辛卯舉於鄉事母袁氏以孝聞刻意著書至忘寢食垂二十年有洪範淺解律呂或問楊熹臨湘人性至孝篤學慎行潛心理學舉明經不仕

從遊者屢常滿戶外

朱潮岳州衛人談理學清修篤行嘉靖初為大禮議力主為人後之說

范鍾臨湘人少篤學善吟咏中嘉靖壬子鄉試官邵武同知以父母年八十告歸以上舊通志

皇清方之玠臨湘人明經未任所著有禹貢山海經圖注

孟子集語舊通志

鍾正章字漢雯平江人幼耽書史兼精楷法嘗以琴自適視一切世味泊如也已卯領鄉薦益留心濂洛諸書所著詩文甚富年六十餘卒於家

常德府

南北朝黃閔楚紀武陵人博學善屬辭嘗撰沅志精覈可紀唐章懷太子為郡國志多採其說

伍安貧明一統志武陵人博雅嗜學梁累降元纁之禮皆以疾辭嘗撰武陵圖志

宋楊維姓譜武陵人登嘉祐進士第幼穎悟工詩神宗朝進宮柳詩百篇上大稱賞御書清白傳家四字賜之

楊枋 楊岳姓譜號存齋武陵人弟岳號字溪嘗師朱晦菴友其門人晏敦復所得益深世稱大楊小楊

明蔣信姓譜武陵人少為諸生貧甚郡守憐之令捧詔適屬縣例得餽贈為助信一無所受王守仁謫龍場寓武陵講學信雖與之遊而卓然自異不盡是姚江之言

貢入南雍祭酒湛若水俾主諸生教學事嘉靖戊子舉  
應天鄉試壬辰舉進士歷官貴州提學副使

冀元亨姓譜武陵人正德丙子鄉薦幼有志操每以古  
人自期待對妻子如賓率族人以正為學務探本源不  
為口耳之習學者稱之

唐相武陵人與蔣信為同年友而師事之潛心理學樂  
道不仕 舊通志

辰州府

明馬元吉沅州人嗜經史邃理學由助教遷長史歸隱  
明山十餘年

楊東煥沅陵人學粹而有文生徒甚眾列膠庠得甲乙

榜者共百餘人 以上舊通志

直隸澧州

唐李羣玉楚寶字文山澧州人詩筆妍麗裴休廉察湖  
南厚延致之及為相以詩論薦羣玉乃詣闕進詩三百  
篇制詞曰李羣玉放懷邱壑吟咏性情孤雲無心浮磬  
有韻吐妍詞於麗則動清律於風騷冥鴻不歸羽翰自  
逸霧豹遠跡文彩益奇信不試而愈精能久幽而獨樂  
念其求志可以言詩用是繫維俾之刊校可守弘文館  
校書郎所著詩三卷後集五卷

宋蘇庠姓譜澧州人以詩名蘇軾一見比之唐李白自  
是詩名籍甚時當路者餌以美官庠笑而謝之卒年八

十餘號後湖居士有文集行世

皇清于登俊澧州人順治戊戌進士令江南清河恩餘於威民懷之登俊通覽羣書解組歸里年近耄老猶誦讀不少懈

龔遇暹澧州歲貢生好讀書其文詞近雅州舊志多出其手

直隸郴州

唐孟瑄韓愈送孟秀才序今年秋見孟氏子瑄於郴州甚少禮甚度手其文一編甚鉅退披其編以讀之盡其善無有不能吾固心存而日識矣其十月吾道於衡潭以之荆累累見孟氏子焉其所與偕盡善人長者吾益

以奇之姓譜元和中進士嘗著嶺南異物志

宋陳純夫明一統志永興人元豐初監舉第一尋以易經魁省試累官通奉大夫後居鄉以文自娛

姚宋佐明一統志靖康間其父寓郴生宋佐少嗜學舉乾道進士初調澧州掾再任校官以詩名性廉介家極貧自號北湖有文集

曹肅姓譜字士先郴州舉鄉薦授寧遠簿平生安分守道四方學者多從之遊著述數十卷尤工於詩子延祚字熙載清修多學足不履城市

李邦聚字仁叔興寧人咸淳二年試禮闈第一官翰林學士子鵬飛舉於鄉俱以文學稱

州志

文苑

長



直隸靖州

〔明〕楊正恒綏寧人弘治乙丑進士嗜學安貧鄉人範之  
馬應乾靖州人嘉靖壬午舉於鄉性明敏有風操家徒  
四壁意到境會吟咏清越

舊通志

湖廣通志卷之五十七

